

## Notg da film 2007 sin piazza da scola Sedrun

**Uonn ha il Forum cultural Tujetsch puspei envidau indigens ed hosps tier la notg da film e presentau treis films, per part vegls, denton era tals fetg actuals ch'han giu premiera. Sut tschiel blau, denton temperaturas pulit bassas per da quei temps, ha in pulit diember gudiu las scenas d'eveniments passai.**

Andre Schmid beneventa ils participonts tier la 5avla notg da film. Danovamein ha il Forum cultural Tujetsch saviu presentar in interessant e zun variont program da film avon ina biala culissa d'aspectaturs ed amitgs da nossa cultura. Uonn ein negins temas principals stai el center dalla notg da film. Aschia ei era vegniu presentau treis parts cun mintgamai ina pausa denteren nua ch' ins ha giu la caschun da prender in sitg e guder ina buna suppa da giutta, ligiongias viennesas ni differentas pettas cun caffè.

### Emprem film; revista 2006-07

Quella producziun da film ei vegnida fatga da Bruno Berther, commember dil forum cultural. El pren mintgamai part dallas occurrenzas e prepara sez la revista. Quei pretenda grond inschign ed in tschuat temps - ad el in grond engraziament per siu grond engaschi. Pigl avegnir giavischass Bruno che quella lavur savess vegnir repartida sin pliras persunas. Forsa ch'enzatgi havess tschaffen da segidar. S' annunziar saveis directamein tier il Bruno.

La revista digl onn vargau ha presentau differentas contribuziuns, numnadamein:

- Sentupada cun nos seniors avon casa s. Vigeli
- Giubileum dil Placi Monn, nurser duront 10 onns
- Inauguraziun sutgera Mulinatsch
- Sogns Retgs
- Divers concerts
- Musical dalla scoletta e scola da Rueras
- Inauguraziun piazza da sport Dulezi
- Orientaziun Porta Alpina entras cusseglier guv. Stefan Engler
- NEAT 2007



### Il cumin dalla Cadi

Ils emprems dus films han tractau la tschentada da cumin dalla Cadi dils onns 1933 e 1971 muossan maletgs dils davos dus mistrals che derivan da nossa vischnaunca. Tochen dacuort ha l'istoria notau igl prem mistral dalla Cadi igl onn 1371 ella persuna da Dominus Petrus da Cavorgia. Quei fa surstar, eran ils da l'autra vart dil Rein buca adina favorisai cura ch'ei mava d'occupar impurtonts mandats politics. In documet da 1368 pretenda en quei grau ina midada historica e numna la persuna da Ulrich Barlotta. Aschia ch'ils da Cavorgia ston bugen ni nuidis surschar quella honor ad in auter liug. Tgi enconuscha buca quei grondius di da cumin cun tut sias reminiscenzas politics avon ina grondiusa culissa dalla claustra da Muster. Deplorablamein ha il pievel buca renconuschiu quei grond scazi e schau valer autras valurs cun scaffir giu la tschentada da cumin. Igl onn 1999 essan nus serendi per la davosa gada a Muster.

Cun ils films dil cumin dalla Cadi vegn schau reviver il vargau ed ina grondiusa manifestaziun politica democratica.

### NEAT 2007

Il film accumpignont tiel studi a liung temps entras IDT - HSG (institut per survetschs publics e turistics dalla Scola aulta Sogn Gagl) duei rimnar igl entir svilup e las midadas caschunadas entras il plazzal da lavur. El center dil film stat il Fabian Deplaz da Rueras che pren adina puspei posiziun. Cun il plazzal eis era el carschius ed ils meinis ein segir era semidai. Pli tard vegn quei film a documentar in impurtont temps ella historia da nossa vischnaunca. Sur liung temps da preparaziun e malsegirtad ei il plazzal gleiti ina part da nies mintgadi e beingleiti stuein nus prender cuminau da quel. Igl onn 2011/2012 vegnan las lavurs terminadas e tut quei che nus vesein ed ei fetg present a nus vegn demontau e recultivau. Senza documentar mass quei temps beingleiti en emblidanza.

Il film ei vegnius producius dalla firma Prisma da Cuera. Dunna Bea Hongler ei stada presenta ed ha persecuitau cun grond interess las reacziuns dalla gliעד en connex cul film. La firma Prisma ha mess a disposiziun gratuitamen il film quella sera. Ell' entira lunghezia ha negin aunc giu viu quei film aschia ch' igl ei stau ina premiera.

Alla fin dalla sera da film engrazia Andre Schmid a ses collegas da suprastanza Tarcisi Hendry e Bruno Berther, a Movie Encarden cun ses gidonters, allas dunnas ch' ein segidadas pil reussir ed a tuts ch' ein stai presents quella sera.

Vinavon menziunescha el ch' il Forum cultural festiveschi uonn il giubileum da 10 onns. Quei vegni fatg il november cun presentar igl emprem tom dallas ovras da pader Baseli Berther. Il niev cudisch cumpegli tut quei che pader Baseli Berther hagi scret sur da nossa vischnaunca. Plinavon vegni ina emprema part da nies archiv cultural inaugoraus cun plazzar differentas bibliotecas privatas.

L'impurtonta vegni segir quella da nies scribent Vic Hendry ad esser. Ei vegni scaffiu in plaz per varga 70 m cudischs e scartiras el dentertract dalla scola.